

Vedlegg 10.

Forskrift om vern av Mosnapp naturreservat, Fyresdal kommune, Vestfold og Telemark

Fastsett ved kongeleg resolusjon 20. desember 2023 med heimel i lov 19. juni 2009 nr. 100 om forvaltning av naturens mangfold (naturmangfoldloven) § 34 og § 62. Fremja av Klima- og miljødepartementet.

§ 1 Føremål

Formålet med forskrifta er å ta vare på eit område som representerer ein bestemt type natur i form av eldre granskog med innslag av lågurt-granskog og eldre furuskog med til dels brannpåverka parti og mykje død ved.

Det er ei målsetjing å behalde verneverdiane i mest mogleg urørd tilstand, og eventuelt vidareutvikle dei.

§ 2 Geografisk avgrensing

Naturreservatet omfattar følgjande gnr./bnr.: Fyresdal kommune: 75/3, 75/4, 78/3, 78/4, 80/1, 81/2, 81/4.

Naturreservatet dekker eit totalareal på ca. 3543 dekar. Grensene for naturreservatet går fram av kart datert Klima- og miljødepartementet desember 2023. Dei nøyaktige grensene for naturreservatet skal merkast av i marka. Knekkpunkta skal koordinatfestast.

Verneforskrifta med kart blir oppbevart i Fyresdal kommune, hos Statsforvaltaren i Vestfold og Telemark, i Miljødirektoratet og i Klima- og miljødepartementet.

§ 3 Vernereglar

I naturreservatet må ingen gjere noko som skadar verneverdiane som går fram av føremålet med vernet.

I naturreservatet gjeld følgjande vernereglar:

- a. Vegetasjonen, medrekna daude buskar og tre, er verna mot skade og øydelegging. Det er forbode å fjerne planter og sopp medrekna lav eller delar av desse frå naturreservatet. Planting eller såing av tre og annan vegetasjon er forbode.
- b. Dyrelivet, medrekna reirplassar og hiområde, er verna mot skade, øydelegging og unødig forstyrring. Utsetting av dyr er forbode.
- c. Det må ikkje setjast i verk tiltak som kan endre naturmiljøet, som til dømes oppføring av bygningar, anlegg, gjerde og andre varige eller mellombelse innretningar, parkering av campingvogner, brakker e.l., opplag av båtar, framføring av luftleidningar, jordkablar, kloakkleidningar, bygging av vegar, drenering eller anna form for tørrlegging, uttak, oppfylling eller lagring av masse, utføring av kloakk eller anna form for forureining, etterlating av avfall, gjødsling, kalking eller bruk av kjemiske utryddingsmiddel. Forsøpling er forbode. Opplistinga av tiltak er ikkje uttømande.
- d. Bruk av naturreservatet til større arrangement er forbode.

§ 4 Generelle unntak frå vernereglane

Vernereglane i § 3 andre ledd er ikkje til hinder for

- a. sanking av bær og matsopp
- b. beiting
- c. jakt, fangst og fiske i samsvar med gjeldande lovverk
- d. oppsetting av mellombelse mobile jakttårn for storviltjakt
- e. felling av store rovdyr i samsvar med gjeldande lovverk
- f. forsiktig rydding av småbuskar og kvist på postar i samband med jakt på storvilt
- g. vedlikehald av eksisterande stiar og sleper i samsvar med tilstand på vernetidspunktet
- h. utsetjing av saltstein
- i. brenning av bål med tørrkvist eller medteken ved, i samsvar med gjeldande lovverk.

§ 5 Regulering av ferdsel

All ferdsel skal skje varsamt og ta omsyn til vegetasjon, dyreliv og kulturminne.

I naturreservatet gjeld følgjande reglar om ferdsel:

- a. Motorisert ferdsel på land og i vatn er forbode, medrekna landing og start med luftfartøy.
- b. Sykling, riding og bruk av hest er forbode utanom eksisterande stiar og sleper.

§ 6 Generelle unntak frå ferdselsreglane

Ferdselsreglane i § 5 er ikkje til hinder for gjennomføring av militær operativ verksemd og tiltak i samband med ambulanse-, politi-, brannvern-, rednings- og oppsynsverksemd, og gjennomføring av skjøtsels- og forvaltningsoppgåver som er fastsett av forvaltningsstyresmakta.

Unntaket gjeld ikkje for øvingsverksemd.

Ferdselsreglane i § 5 andre ledd er ikkje til hinder for

- a. naudsynt motorferdsel i samband med uttransport av sjuke og skadde bufe. Køyretøy som nyttast skal vere skånsame mot markoverflata. Det skal gjevast melding til ansvarleg oppsyn for verneområdet i forkant av køyring
- b. naudsynt uttransport av felt elg og hjort med lett beltekøyretøy som ikkje set varige spor i terrenget
- c. landing og start med Forsvaret sine luftfartøy
- d. naudsynt motorferdsel i samband med jordbruksdrift.

§ 7 Spesifiserte dispensasjonsreglar

Forvaltningsstyresmakta kan etter søknad gje dispensasjon til

- a. tiltak i samband med forvaltning av vilt og fisk
- b. merking, rydding og vedlikehald av gamle ferdselsveggar og nye stiar
- c. hogst av etablerte plantefelt
- d. istandsetting, vedlikehald og skjøtsel av kulturminne
- e. avgrensa bruk av naturreservatet for aktivitetar som nemnt i § 3 andre ledd bokstav d
- f. mellombels gjerding i samband med beiting
- g. øvingskøyring for formål nemnt i § 6 første ledd
- h. uttransport av felt elg og hjort med anna køyretøy enn lett beltekøyretøy som nemnt i § 6 andre ledd bokstav b
- i. sikring av gruveopningar på gnr./bnr. 80/1
- j. rydding av vegetasjon ved utsiktspunkt avmerkt på vernekartet
- k. naudsynt motorferdsel i samband med aktivitetar etter § 4 bokstav h og § 7 bokstav a, c, d og f.

§ 8 Generelle dispensasjonsreglar

Forvaltningsstyresmakta kan gjere unntak frå forskrifta dersom det ikkje strid mot formålet med vernet og ikkje kan påverke verneverdiane nemneverdig, eller dersom omsyn til tryggleik eller til vesentlege samfunnsinteresser gjer det naudsynt, jf. naturmangfoldloven § 48.

§ 9 Skjøtsel

Forvaltningsstyresmakta, eller den forvaltningsstyresmakta bestemmer, kan setje i verk tiltak for å oppretthalde eller oppnå den natur- eller kulturtilstanden som er formålet med vernet, jf. naturmangfoldloven § 47.

§ 10 Forvaltningsplan

Det kan utarbeidast forvaltningsplan med nærare retningsliner for forvaltning av naturreservatet. Forvaltningsplanen kan innehalde nærare retningsliner for gjennomføring av skjøtsel.

§ 11 Forvaltningsstyresmakt

Fyresdal kommune er forvaltningsstyresmakt etter denne forskrifta. Miljødirektoratet kan fastsette annan forvaltningsstyresmakt.

§ 12 *Iverksettning*

Denne forskrifta trer i kraft straks.

